



March
2019

KRISTIAN THALAI



Vol. IX No. 13

Kristian Thalai Pawl Chanchinbu thla tin chuak

HRINGLANG TLANG pg.29 KANTU pg.27 NGAIHNAWM NGAIHAWM pg.23 EDITORIAL pg.2
SUNNA pg.25 WORK CAMP pg.12 HRUAITUTE CHANCHIN pg.18 KEIMAHNI pg.31

NUN NGHET, TLO LEH RINTLAK

Rev. K. Lalrinmawia, ES i/c KTP


TUIKUAL NORTH KOHHRAN BIAK IN KTP ROREL INKHAWM 2019

FEDERICK LALRINDIKA - BIANGBIAKNA

ALICE COOPER - AN CHANCHIN

GYM TESTIMONY
Lalnunmawii

BIBLE STUDY
Pastor Bena





Zawlpui Pastor Bial KṽConference



Phuldungsei Pastor Bial KṽConference



East Lungdar Pastor Bial KṽConference & Golden Jubilee

Kristian Ṭhalai Pawl chanchinbu thla tin chhuak

1970-a chhuah ṭan - Kum 49-na vawi 3-na - Chhuah tawh zat : 484

Editor :

Robert Lalduhzuala

Joint Editors :

C. Malsawmtluanga
Lalsiammawia Pachuau
Malsawmtluanga
K.Lalchhanhima

Manager:

Lalrinchhana Ralte

A lak man :

Kum khatah - ₹ 80.00
Copy khat - ₹ 7.00

*Thu chhuah tūr nei chuan Editor,
Kristian Ṭhalai, Synod Office-ah thawon
tūr a ni a; a la duh chuan KṬP Office-ah a
man pēk lāwk a ngai.*

Office Phone : 8794796008

E-Mail :

kristianthalai1970@gmail.com
centralktp@gmail.com

KRISTIAN ṬHALAI PAWL

Thupui

Rawngbawl tūra chhandam

Thupui inngahna

Ephesi 2:10. Thil ṭha ti atán
Krista Isuaah chuan siama awmin,
ama kutchhuak kan ni si a, chu thil
ṭha tih chu kan awmna tūrín
Pathianin a buatsaih lāwk a ni.

Thiltumte

1. Isua Krista rinna leh amah anna
kawnga ṭhalaité hruai.
2. Kohhran kutke ni tura ṭhalaité
buatsaih.
3. Kohhran hnathawh tihpuitlin.
4. Krista Chanchin Ṭha puan
darh.

A CHHUNGA THU AWMTE

1. Editorial	2
2. Sermon - <i>Nun nghet, tlo leh rin tlak</i>	3
3. Biangbiakna - <i>Frederick Lalrindika</i>	6
4. An chanchin - <i>Alice Cooper</i>	10
5. Work Camp - <i>Kamranga, Pailapool-ah ve thung</i>	12
6. Bible Study - <i>Pastor Bena</i>	14
7. Hruaitute Chanchin - <i>Upa K. Lalnuntluanga</i>	18
8. Article - <i>Gym Testimony</i>	20
9. Ngaihnaawm Ngaihawm	23
10. Sunna - <i>Vanlalmangaihi</i>	25
11. Kantu - <i>Kawrthindeng</i>	27
12. Hringlang tlang - <i>Lianchhunga te ṭhian</i>	29
13. Keimahni	31



RORELNA DIK LEH HUAISEN

February ni 16, Kristian Thalai Pawl tana ni pawimawh em em KṚP Day kan hmanz zova, kum tina a inchhawka kan neih thin General Conference leh General Conference neih loh kuma kan neih thin KṚP Rorel Inkhawmin a rawn zui nghal zat bawk a, Bial hrang hrangah Bial KṚP Conference hmangan, bial leh branch-ten kan rawngbawlna tura ruahmanna kan siam hun a lo ni bawk a, KṚP-te tana hun pawimawh tak kan paltlang mek a ni.

Thuthlung hlui hunah chuan Lalpa zawlneiten huaisen takin Pathianin an hnena thu a sawite an puang chhuak thin a. Lalin ro a rel dik loh emaw, ramin a bawhchhiatin emaw Pathian thu angin chhanhim hna an thawk thin. Chutiang bawkin kohhran hruaitu hmasate khan kohhran leh ram inrelbawlna rual tak leh dik taka a kal theihna turin theihtawpin ke an lo pen thin a, a rah sengtute kan ni. Tunah pawh hian kohhran leh KṚP-te mawhphurhna hi a la bo reng reng lo va, huaisen taka rorel leh hmalak a ṭul hun a awm ang a, zaizap tak leh zawldawh taka rorel a ṭul chang a awm bawk ang.

Ringtute hi ramin a bawhchhiat laia thuthluanga lo thlir veng veng tur kan ni lo va, ram hruaitute ke chheh a dik loh laia lo awm mai mai a thianga bik hek lo vang. Puih an ṭul huna puia, kal sualna laka venpuia, siam tha tura huaisen taka hmalatu tur zawk kan ni. Chutih rual erawh chuan kan Pathian thu 'Bible' min zirtirna anga kal a ngai tih erawh kan dah len ber tur a ni ang.

Ram leh hnam humhim leh siam thatna kawngah hian KṚP member-te hi inla ralbang ngawt thei kan ni lo va, mawhphurhna lian tak kan nei ve tih te hi kan hriat reng a ṭul hle. Kan Pathian thuin ram leh hnam din chhuahna bulpui ber a tih kha kan thiltum zinga mi, 'Krista chanchin tha hril' hi a ni tih kan hriat thar fo a ṭul. KṚP Rorel Inkhawm a lo thlen hian, chu chanchin tha nena innila kan KṚP rorelna leh ruahmanna hrang hrangte pawh hi a kal a ngai a ni tih min hriat nawontirtu lo ni se a va duhawm em!



NUN NGHET, TLO LEH RIN TLAK

Sermon

Rev. K. Lalrinmawia, ESI/cKTP

(Gen. 39:6c-10; 1 Kor. 15:58)

Story I

Khuarkhurum thuk zet, ro hulh mai leh lum up churh kaṅang chuan chhun pachangah chung lam a han thlir thin a; puitu nei lo chuan han lawn chhuah rual a ni lo. A au ri hre phaa awm chhunte chu thlaler laitel leh chingchip tih lohvah chuan chu khuarkhuruma amah thlaktute chauh an ni si. Anni lah chuan an thisen zawmpui anih avanga that lo chauh an la ni lehngal! Khai chhuak tura beisei ngam an ni mawlh lo.

Rei fe hnuah chuan mi dang an awm ve tih hriat takin an inbe nawk nawk a, sanghawngsei thir phek phurh ni awm tak a inkhak ri leh zauh bawk thin. Mak tak maiin beisei ngam hauh loh thil a lo thleng tlat! Chu khuarkhurum ipik zeta dahtute ngei chuan hruizen thlakin an rawn khai chhuak tlat mai, amah an be si lo va; ngawi rengin an la chhuak mawl tawp a. Chumi hmunah chuan thi turin an kalsan mai bik awzawng lo. Hmelhriat loh eng emaw zat leh sanghawngsei thil phur lo inhawr tuau tuau zingah chuan an nam kat pheh nawk nawk a; hnam dang

sumdawng hnenah chuan an hralh a lo ni reng mai! Aw, a hralhtute lah ama pianpui unaute ngei, zah tak leh thu awih taka a lo zui thinte kha an ni asin maw! Engtia hmelhriat loh pa bumro leh hruanghrau pui pui hnena hralh ta ngawt chu ni maw?

Ni eng emaw zat a ngaihna hre lo taka a zui mikhualte nen chuan khawpui pakhat an thleng ta. Dawr lun laiah an hruai a, tlan chhuak thei lo tur tawk, zawi deuhva kal ve thei tur sia a ke an phuarna chu hlipin a kutbawr pahnih an phuar ta thung a. Chu khuaa pa zahawm tak, sipai hotu tih hriat tak chuan a lei

chhuahtirin a en ngun hle a. A mitte chu a han keusak leh rih thin. Nakinah chuan chu sipai hotu chuan amah hruaitute hnenah chuan pawisa a pe a, ama in lam a panpui ta. Hmelhriat loh chhungkaw zahawm takah chhiahhlawh hna thawkin Josefa chu a awm ta ran mai.

Chhunah rim takin hna a thawk a, zan muthmuna a muthilh hma chuan mittui hruin a tap fap fap thin ngei ang. A nunna ngei pawh a tana hlan phal tur khawpa hmangaihtu a pa Jakoba a ngai thin asin. Chu inah chuan beiseina bo lovin thu awih takin a awm a; mi rin tlak, mi rinawm, mi taima leh thahrui pawh nei tak a ni tih a pute nupa chuan an hre thuai a. A pu Potifara nupui lah chu nu hmeltha leh pian nalh zeh zawih, ngaihnopei tak hi a ni a. A pu hmuh lohvah chuan a pi chuan a han nuh deuh seih thin lehngal a. Chu nu chu a hmel zawng a thain a pian pawh a nalh thlawt a ni.

A pu chu sipai hotu tih takah ni rei fe fe thangin a chhuak bo fo va. Ni khat chu a pi chuan chhiahhlawh dangte chu pawn lamah a tir

chhuak vek a, Josefa chu pindanah luhpuin a inphelh khum ta a. Mahse, Josefa chuan a pi chu nam kian pahin, "...engtin nge he sual lian tak hi tiin Pathian chungathil ka tihsual theih ang?" tiin a tlan chhuahtirin ta.

Story II

Josefa hian a nunah ama chakna tihpuitlin aiin Pathian duh dana nun a thlang zawk a. Josefa ang bawh hian Daniela te thianho chuan intihtunlai, thangthar khawvela mite tih ang tih ve hrim hrim tum lovin, 'lal chaw leh uain' aiin Pathian duh dana nun an thlang a, ei tur thlai hnah leh in tur tuisik an thlang zawk! Ni sawm chhunga fiahnaah lal chaw tui hmel ei thinte aiin an sar nalh zawk a, an hmel a tha zawk bawh! (Dan. 1:8-16)

Sadraka, Mesaka leh Abednegoa pawhin rawh tuina meipui an hmachhawn pawhin Pathian an phatsan duh chuang lo (Dan. 3:18). Pathian phatsan ai chuan meipuia paih luh an thlang zawk! Meipui an paih ngei a, an him pial a, lal lakah an dinhmun a tha zual sauh zawk asin (Dan. 3:19-30).

Story III

Saw nula saw 'hmel̄ṭha leh fel' in ti maw? Pasal nei lovin nau a pai puar luah saw! Josefa nen an inhual tawh ngei a, Josefa lahin, "Kan la mu dun awzawng lo," a ti bawksi! A ruki mipa dang a khawsakpui a ni zawk lo maw? Keini Juda hnam dan chuan an inhual tawh miau avangin Josefa nupui tluk a ni tawh reng, mi dang fa lo pai leh chu uire a ni mai, uire! Tenawm leh lutuk! Dai pawna lunga den hlum tura hnuh chhuah tur a nih saw!

Nia, Mari dinhmun kha a hlauhawm asin! A pasal hual Josefa, a rilru luah khattu, a ta ni ngei tura hlim taka hma lam thlirtirtu ngei khan UIRE-ah a ngai ang maw? Mari tan tuar rual a ni dawn em ni? Chu achhapah khawtlangin uireah ngaiin lungin an deng hlum bawksi! Mahse, vantirhkoh hnenah chuan, "Ngai teh, Lalpa bawihnu ka ni, i thu ang zelin ka chungah thleng rawh se," (Lk. 1:38) zu han ti a!

Heng mite hi engati nge an nun a ngheh em em bik? An nun leh rilruin a hlut ber chu Pathian thu awih a ni. Pathian an ring tawp a, hlawkna dang, himna dang

leh hlimna dang zawngin an um tawh lo. Pathianah an innghat thlawp a; khawvel mite ngaihsan nihna kawng an zawng lo. Pathian thu awihah an lungawi a, mi neih ang apiang neih ve zel an tum lo. Mipat hmeichhiat nawmsip bawlna aiin Pathian thu awih hi hlimna tluantling zawk a nih an pawm mai a. Mite hmuhsit nih aiin Pathian paw khawih an hlau zawk. Kut tling lova hausak aiin mahni thawh chhuah taw renchem taka hman daihzai a hlu zawk tih an hria. He khawvela nawm aiin chatuana nawmna an thlang a ni.

Nang Kristian ṭhalai, ruih nawmna hian eng chen nge a tihhlim che? Nang ram leh khawtlang phal loh damdawi zuartu, pawisa nge hlu zawk Krista? Krista leh hausakna hi a neih kawp theih asin, rinawm taka awmin inren takin nung mai rawh. Zannahathawh ni si lovin meng chiam chiam lo la, zingah hma taka thovin nun nghet pe theitu Lalpa pawl ṭhin rawh le!

A chungah thawnthu pathum aṭanga kan hmuha a changtute ang khian, *Lal Isua ka duh ber min hrulaitu atan i ti ve dawn lo'm ni?*



Biangbiakna **FREDERICK LALRINDIKA**

KṚ : I pian leh murna, i chanchin tlangpui, kohhran leh KṚP-a i rawngbawlna te min hrilh thei em?

Frederick : Ka hming chu Frederick Lalrindika a ni a. Ka pa hi F. Lalthantluanga a ni a, ka nu hi Lalremzuali niin nau pakhat Matthew Lalrinfela ka nei a, kan unau hi pahnih kan ni. Ramhlun North vengah awmin Presbyterian Kohhranah kan lawi a; tin, KṚP-ah Evangelical Sub-Committee-ah awmin, Vice Chairman ka ni ve mek bawk.



KṚ : Rawngbawlna bul i ṭan chhoh dan hi khawngaihni min hrilh ta che.

Frederick : Class XII kan nih kum aṭang hian Pathian thuah tuina leh ṭahnemngaihna kan nei tawh a. Chutih lai chuan

kan class-a mite theih ang angin Pathian thu ka hrilh thin. Ni khat chu Pathian thu ka sawi nasa lutuk hi ka thutna min sawnsak a, Pathian thu ka sawipui theih loh deuh hlek tur bulah min thuttir a, thinlunga khat liam chu kain a sawi thin si a, ka sawi lo thei si lo va, chu Pathian thu ka sawina atang chuan Pathian zawk chuan ka bula mite chu a tidanglam ta a. Zirtirtute chhuah veleh hian *lectern*-ah dingin Pathian thu ka sawi ve nghal mai thin a. Chu veleh, "Frederick-an Pathian thu a sawi a nih chu," tiin an lo hawi ta thup thin a ni.

Tum khat chu chutia Pathian thu ka sawi lai chuan Thlarau Thianghlimin hna a thawk a, class dang dangahte a kang kai a, chumi kal zelah chuan crusade te, camping te kan nei chho va. Chu chu rawngbawlna bul ka tan dan chu a ni ber.

College lamah pawh theih ang tawkin zirlai zir pahin ka ti ve nawk nawk a. Pathian thu lama tui veho kha Inrinni hun awlah class room remchang hawhin hun kan neihpui a, kan luhna Hrangbana College-a hostel-

ler-ho hnenah te hun kan hmang kan hmang a, chu chu team anga kan inzawm khawmna hun lai pawh a ni. College kan han zawh chuan kan thiante pualin crusade te kan nei a. Kan rawngbawlna ah hian tihdamna a tel ve thin a, chu chu mite pawhin min hriat tanna niin ka hria. Tichuan, college lama *Mizoram Students' Evangelical Union (MSEU)* hi kan rawngbawlna peng pakhat a ni a. Zirlaite hnenah rawngbawlna te min siamsakin kohhran thenkhatte'n min lo hre tan a. Hruaitute duhsaknain kan ti ve zel a, chungte a nih avang chuan thingtlang khaw lamah te bul tanin kan ti naw naw a, tun hi kan lo thleng ta a ni.

KṚ : *Rawng i bawl tawhnaah Pathian hnathawh sawi duh i neihte engte nge? Chung zingah chuan nangmah han khawih zualtu che pawh a awmin a rinawm a, hriat a chakawm hle mai.*

Frederick : Rawngbawlna hmuna Pathian hnathawhah chuan, Hunthar Venga crusade kan neih tumin kan pi pakhat hian an tupa harh tawh lo hi a rawn pawm a,

Team-te'n lo check-in a mar an hmu tawh lo va. Ka mangang khawp a. Chutih lai tak chuan Rom 8:11-a, "Mitthi zing ata Isua titholehtu Thlarau chu nangmahniah a awm chuan, mitthi zing ata Isua titholehtu Thlarau zarah in taksa thi thei pawh a tinung bawng," tih kha Chiang deuhvin Lalpan min rawn pe a, Isua pawh a taksa thi tawhah Thlarau Thianghlim a rawn thlen chiah khan a taksa thi tawh pawh a tinung leh a ni. Chutia Thlarau Thianghlim ka dilsak mek lai chuan chu naupang chu a rawn harh leh ta a ni.

He thilin ka rilru a khawih em emna chu, sakhaw dang hian tihdam theihna hi an nei ve a. Chu naupang chu a hit vek tawh a, mite'n engtin nge an sawi chu ka hre lo va, khatih hun lai dinhmunah khan Thlarau Thianghlim ngei chuan tinungin amah chu a rawn kaitho leh tih chu hai rual a ni lo a ni. Thil mak pawh ni lo, damlo tihdam mai pawh ni lo, kan Pathian ngei hi pathian dange nena khaikhin pawhin kan Pathian chauh hi nunna chung a roreltu a nihzia ka thinlungah a fiah khawp mai.

Aigupta ramah pawh hian Mosia hun lai khan thil mak – tui thisena chantir, tiang rula chantir, etc. an ti ve thei zel a; nimahsela, fa tir tihhlum a nih chiah khan an titho thei tawh lo. Chu chuan a entir chu, kan Pathian hi nunna leh thawhlehtu chung a roreltu, kan thih hunah pawh kan chung a roreltu tur a nihzia a tifah takzet.

Keimah min khawih zualtu chu – kut kan han nghaha, Pathian hnathawh lo lang thin mai hi kan tih a nih lohzia hre Chiangtu kan ni a, a mak ti ber ber pawh kan ni. Chutih rualin a hnathawh lo langa, hnam dang mite Isua hnenah an inhlan hmel ka hmuh hian mite thinlunga Pathian ram lo zauva, hremhmun kawngkhar inkhara, vanram kawngkhar lo inhawng ta hi van mipuite pawh hian kut an lo ben ve hial te ka ring a ni.

KT : *Rawngbawlna hma-chhawp mek eng nge i neih?*

Frederick : Kan programme hi November thla thleng vel kan rem chho ve a, India ram pawnah kumin hian hmun li vela min sawmna te tih-

hlawhtlin kan tum ve a, chumi a nih loh chuan Mizoram chhunga neih turin programme hi kan siam chho a ni.

KT : *I rawngbawlna hi engtia kalpui zel nge i tum?*

Frederick : Rawngbawlna kalpui zel tum dan tihah hian, thalai tam tak hi Krista tana nung ngam tura an thinslunga thusawi theih hi ka chak khawp mai a. Isua vanga thih hi chu kan ngam khawp a, ruih theih thil ti nasa tak pawh hian kan ngam vek; amaherawhchu, kan ram hian kan mamawh chu tunlai khawvel chakna leh thlemna tam tak karah Krista tana nung ngam hi kan tlem khawp a. Chutiang mi chu Lalpa'n thawhpui a duh a, he kan thalai khawvel, thlemna hrang hrang karah hian Lalpa'n a lama rilru dik tak putute chungah a chakzia tihlan a duh a ni. Kan awmna hmun theuhvah Lalpa hian min thawhpui a duh takzet a, ka tawngtaina pawh a ni.

KT : *KTP member-te hnenah eng nge chah duh i neih?*

Frederick : Thuchah lamah hian kan KTP inngahna

thupui chu rawngbawl tura chhandam tih a ni a. Isua hi vanram kan kai nan chauh khawvelah a lo kal lo va, vanram kan kai nan chauh lo kal chu ni se Isua kan neih ni khan vanramah min la chho vek tawh ang. Nimahsela, Johana 17:15-ah chuan, "Anni hi khawvel ata i lak chhuah tura ngen ka ni lo," a ti. Isua Krista hi vanram kan kai nan chauh ni lovin, amah kan neih tawh hnua khawvela kan la awm chhan chu he khawvelah ngei hian ama tan nung turin, rawngbawl turin, kan office-ah, kan eizawanna hmuna, kan zirna hmuna nung turin min chhandam a ni tih hi kan Kristian Thalai Pawl thupui niin ka hria. Isua kan neih hian vanram kan ta a ni a, vanram kai chauh ringtu chuan thil a tisuah a tisuah mai thin. A chhan chu naktukah ngaihdam a dil leh thei a.

Nimahsela, Lalpa'n Ama tana nung turin min dah a ni tih hretu chuan wawin lek pawh hi uluk takin a hman thin a, chu vang chuan KTP inngahna thupui, rawngbawl turin min chhandam tih hi Lalpa'n a tharin kan thinslungah sawi nawn leh se tih hi ka duh takzet a ni.

An Chanchin

Alice Cooper

Concert-naa
 rura taka
 che thin, naute
 lem lu tana,
 satanic tak taka
 chet ching,
 maksak tak taka
 inchei thin, kum
 1970 leh 1980
 inkar vela "I'm
 18", "Schools'
 Out" tih hla leh
 kum 1973-a
 "Billion Dollar
 Babies" tih
 album avanga
 khawvelin a
 hriat lar, mi tam
 tak ngaihsan em
 em, mi tam takin
 an sawisel nasat
 em em ni baw,
 zaithiam lar, Alice
 Cooper (Vincent
 Damon Furnier)



pianthar thu hian mi tam tak mak tih a hlawh a, chutih rual
 chuan Pathian ropuizia leh thiltihtheihzia lan chhuahtirtu
 pakhat chu a ni chiang mai.

Alice Cooper hi Grammy Awards dawng thei turin vawi
 hnih chhawp chhuah tawh a ni a, an band pawh Rock and
 Roll Hall of Fame-ah kum 2011 khan lak luh an ni hial a. Zai

lampang bakah lemchan lamah pawh hnuhma a nei nual nghe nghe a ni.

Hun eng emaw chen kal taah khan Alice Cooper chu thiin a luak vak mai a, amah lah chu chaw a ei mumal loh avangin a cher em em mai bawksi a, a taksaah chuan thil dik lo nasa tak a awm a ni tih chu a hre thiam mai. Jimi Hendrix-a te, Jim Morrison-a teho nen khan an inkawm nasain, zu an in ho nasa thei hle. Chumi avang chuan anniho chu naupang takin an thi zo tawh. Ani pawh chuan a zu in thin chu a sim vat loh chuan a thi thuai dawn tih a hre Chiang hle.

A nun chu a beidawng ngawih ngawih a, zu ngawl vei a nih avangin a bik taka enkawl ngaiin a awm a ni. Chu hun thim takah chuan tlanna tur dang a nei tawh lo, Pathian lam hawi mai loh chu. Chutichuan, biak in lam a pan a, Bible te chhiar thar lehin, Pathian hnenah jawngtaiin a hnenah a tlu lut leh ta a, chutah chiah chuan a mamawhtute tana tlanche ve ngai lo Pathian chuan a mamawh hun takah a chhanchhuak ta a ni.

A pa hi Pastor a ni a, a pu kha Evangelist a ni bawh. A tet lai atanga biak ina hun tam tak hmang thin a ni. A nasa thei ang berin khawvel lam, mipat hmeichhiatna leh ruih theih thilah a tlan a, chu chuan a ei hlum thelh a, chumi hnuah a awmna ngai biak in lamah a let leh ta a ni.

A pianthar hnuin a nun chuan awmzia a nei tan ta chauh va. Ni tin Bible chhiara jawngtaiin Pathian hnenah a inhlan ta ziah a, Pathianni apiangin Pathian be tura biak ina kal a thulh ngai ta lo. Thihna ata nun petu chu a hrechanga, a tan tlansan phal chi a ni tawh lo.

He Pastor fapa hi pianthar hnu hian concert neih thin tho mah se, a nunah danglamna a lo awm ta a, a zai dawn apianga rura taka che thin kha a chhonzawm thei tawh lo. Naute lem lu tana, maksak tak taka inchei tawh lovin, Pathian hnenah a inhlan hmasa thin ta zawk a ni. A mi mal nun leh Lal Isua inzawmna nung tha tak a neih avangin chu chu a ngaih pawimawh hmasak ber a lo ni ta a ni.

Work Camp



Kamranga, Pailapool-ah ve thung

*Israel Vanlalchama, Asst. Secretary,
K.F.P., Baktawng Venghlun Branch*

Kristian Thalai Pawl, Baktawng Venghlun Branch chuan kam 2018 chhunga Project atan Work Camp neih ni se tiin a rel a. Thingtlanga cheng kut hnathawka ei zawng tan chuan thil huphurhawm tak, kan puitlin thei ang em tih ngaihtuah ngai tak chu a ni. Hun a kal zel a, theih ang angin inhlawhna remchang awm apiangah kan inhlawh ve zel a. Tichuan Branch Committee-in kan thawhna hmun tur lo ngaihtuah tur mi a ruat a, kan mi ruatte leh kan Pastor Benny Lalmawia te chuan theihtawp chhuaha an ngaihtuah hnuin Pailapool Pastor Bial, Kamranga hmunah thawh tur a awm tih hriat a ni a. Branch Committee chuan November 19-23, 2018 chhunga neih turin a rel ta a ni.

Branch Committee chuan theihtawp chhuahin hma a la zel a, kan member hmun danga awmte leh kohhran committee, kohhran nu leh pate pawhin min phurpuiin hma min lakpui baw a; tichuan, kan hun ruat November 19-23, 2018 (Thawhtanni) zingah Bialtu Pastor, Benny Lalmawia chuan tawngtaia min thlahin kan hnathawhna hmun tur panin kan kal chhuak ta a ni. Buaina leh harsatna lian tawk lovin Pailapool Pastor quarters chu tlai dar 6:30-ah

kan thleng a, hetah hian chaw ei tur min lo siam chu kan ei zawh hnuin kan thawhna tur Kamranga panin kan chhuak leh ta a, zan dar 8:30-ah kan riahna tur hmun chu kan thleng ta a ni. Work Camp-a kalte hi KTP member 23 bakah, Kohhran Upa pahnih leh mistiri pakhat kan ni a, kan vaiin mi 26 kan ni.

November 20, 2018 (Thawhlehi) zing a tangin hna kan thawk tan a, chhun lamah Lalang Singlup (Pailapool Pastor Bial)

Kohhran Silver Jubilee lawmnaah min sawm angin kan kal a. He hunah hian Zaipawlin hla te remin lawmpuina thilpek te kan pe baw a ni. Jubilee lawmna a hun kan hman zawhin Pailapool Kohhran Hall tukverh fit-sakin hun kan hman leh baw. Ni 21& 22.11.2018 (Nilaini leh Ningani)-ah Dispensary chung thlak leh biak in chhehvel tifaiin hun kan hman leh a, Pathian awmpuinain kan hnathawh tur ang angtu chu tuang takin kan thawk zo thei ta a ni.

November 23, 2018 (Zirtawpni) zing dar 5:00-ah Kamranga-a missionary Lalhluthangi chuan Pathian hnena tawngtawna hun hmaning Kamranga

chhuahsanin Baktawng lam panin kan kal leh ta a. Tuang taka kal zelin Baktawng luh dawna tawngtawna hmunah Upa Lalchhuansanga chu lawm thu sawiin Pathian hnenah a tawngtawna; tichuan, tlai dar 5:00 velah Baktawng chu kan thleng leh ta a ni.

A tawp berah chuan kan work camp chung zawnga min hruaitu Pathian hnenah lawm thu kan sawi a. Kohhran Committee leh Kohhran Hmeichhe Committee, sum leh paia min tanpuitute chungah te leh mahni hna tawng tak kalsana work camp-a kal zawng zawngte chungah Branch KṚP chuan lawm thu a sawi takmeuh a ni. Pathianin malsawmna a vur let theih nan duhsakna kan hlan a che u.

KṚP INKAIHHRUAINA

KṚP Inhruaina Dan hi Synod Executive Committee pawmpuia siam a ni a, he inkaihhruaina hi ennawn thin a ni. Kum 1954, 1962, 1969, 1974, 1982, 1985, 1990, 1995, 1999, 2004, 2009, 2014-ahthe khan ennawn tawh a ni a, tunah hian CKṚP chuan inkaihhruaina ennawn chungchang SEC-ah a thlen leh mek baw. SEC 251:40-in a rel angin 'KṚP Inhruaina Dan' tih thin chu 'KṚP Inkaihhruaina' tia thlak a ni. He inkaihhruaina baka tawng dang a awm chuan CKṚP-in Bial leh Branch hriat tur circular a tichhuak thin.



Tu nge Amosa? Lal Isua pian hmâ kum zabi 8-na lai vêla zâwlnei a ni a. Jerusalem ațanga chhim lam km. 19 vela hlaa awm, thingtlâng khaw te tak tê Tekoa (Tûnah chuan khawram a ni tawh) khaw chhuak a ni. Hetih hun lai hian Israel ram chu lalram pahnih – Juda lalram (Chhim lam) leh Israel lalram (Hmâr lam)-ah an ințhen a. Chhim lam Judai rama awm ni mah se, hmâr lam Israel ramah rawng a bâwl a ni. Bethel kiang vêla rawngbâwl niin a lang a. Hosea, Mika leh Isaia-te nen hun khata (Contemporary) awm an ni.

Eng hna nge a thawh țhin? Zâwlnei hna a thawh hma hian ran rual vêngtu a nih thu kan hmu a (1:1). Tin, theipui a enkawl țhin thu a sawi bawk (7:14). Hêngte hi ama ta a enkawl nge mi ta a enkawl hriat a ni lo. Jeremia leh Ezekiel-te anga zâwlnei leh zâwlnei pâwl (Professional prophetic guild) a telah erawh chuan a inchnâl lo, “Zâwlnei ka ni lo a, zâwlnei fapa pawh ka ni hek lo,” a ti (7:14).

Khawtlâng dînhmun : Israel ramah Lal Jeroboama 2-na lal lai (786-746 BC) a ni a. Judai ramah erawh Lal Uzia lal lai (792-740) a ni. Ramin hma a sawn nasa êm êm a. A

râlmuang a. Sum leh pâi tam tak an dek chhuakin in ropui tak tak an sa a. Thlasik in te, nipui in te an nei hrang hial a ni. Saingho in te, saingho khum te an nei bawk (3:15). Mahse, hmasâwnna chu a kai rual lo êm êm mai a. A ti theite an lian thûr thûr a, lei rem rap ve thei lote chu an bet tlawk tlawk mai a ni. Mi hausaten ‘mi retheite lu chung a vaivut takngial pawh an ît a, pachhiate an rûksak țhin’ a ti a (2:7). “Tangkarua-in mi fel an hralh a, pheikhawk bun khatin mi tlachham an hralh bawk țhin,” a ti hial bawk (2:6). Hêngte hi mi retheite rah beha an awmzia leh an

chhawr retheihzia a sawina a ni. Mi hausa nupuiten nuam an tâwl a, zu leh sa chênin, “Rawn la ula, i in ang u,” an ti a. Amosan, “Basan sebâwng châwm thau angte u,” a ti (4:1). Basan ram chu Reubena thlahte, Gada thlahte leh Manasea thlah hnam chanve luah ram Jordan râla mi a ni a, thlaiin a ngeih ram tha tak niin bâwng thau tak takin an châwm thîn.

Rorêltuten dikna an hlamchhiah a. Rorêlna sai thinga chantîra, felna chu leia paihthlate u, a ti (5:7). Rorêlna dik mi felte inhumhimna chu thil kha leh tawrhhlelhawmah an chantîr a ni.

Sumdâwngte pawh an rinawm lo hle mai. Buh an zawrh nân thla thar ral an nghâkhlel a, chhangphut an hralh theih nân Chawlhni ral an nghâkhlel baw. An kût nî leh Chawlhni (Sabbath) te chu an hmu ringawtin an serh a, an thinlung erawh chuan Lalpa a hlat si. Tin, an thil zawrh tûr an lâkin an bûkna hman an tirit a, an hralh leh dâwnin an bûkna an tizâng leh thîn. Ephah titêin Sekel an tirit thîn a ni (8:5).

Sakhaw nun : An intisakhaw mi êm êm a. Pathian be tûrin an sakhaw hmun – Bethel, Gilgal, Beersheba thleng thlengin an kal thîn a. Mahse, an sual an sim chuang si lo. Sual an pawmzam a. Sual kalsana Lalpa lam hawi tûra fuihtu Nazarit mite uain an pe a, zâwlnei pawh thu hril tawh lo tûrin an vau hial a ni (2:12). Ram tiama a hruai luh Israel fate nun chu Pathianin a dem êm êm a. Chuta zâwlnei hmanga a vaukhanna âw lo chhuak ta chu, “Aw Israel, i Pathian tâwk tûrin inpeih rawh,” (4:12) tih hi a ni.

Pathian tâwk tûra an inpeih dân tûr chu eng nge ni?

Simna : An sakhaw hmun thianghlim – Bethel, Gilgal leh Beerseba-ahte va kala, mahni inthiam chawp nâna va inthawi chu an lungawipui a. Mahse, Pathian erawh an chungah a lungawi si lo, “Bethel-ah lo kal ula, bawhchhe rawh u, Gilgal-ah chuan lo kal ula, bawhchhiatna tipung rawh u,” a ti. Bethel leh Gilgal, an sakhaw hmun thianghlima va kala, va inthawi chu an thlarau nun mamawh ber a ni lo. Lalpan a phût chu sual simna a ni.

Zoram ringtute hian i hre mawlh ang u. Sim si lova inthawi chu bawhchhiatna tipungtu mai a ni. Lalpa khawngaihna kan chan hnua rinna kailâwn kan rah hmasak tûr chu simna kailâwn a ni. Chutah chuan ngaihdamna kan chang ang. Sual simin Lalpa i pan ang u, min ngaidam duh a ni.

Dikna : “Nimahsela rorêlna dik chu lui angin luang sela, felna chu luipui kang ngai lo angin luang rawh se,” (5:24) a tih laiin Amosa hun laiin diknain hmun a chang lo. ‘Kulh kawngkaa dik taka rorêltu chu an hua a, thu dik tak sawitu chu,’ (5:10) a ti. An nunna atâna Mosian Sinai tlâng ațanga a lâk Thu Sâwm Pêkte chu an lo theihngihlh zo ta a. Israel fate nunah dikna a fam a. Felna tel lo nun chu Lalpan a dem a ni.

Kan ram dinhmun nêna va inang êm! Ram rorêlna fawng chelh tuma dikna thil khâ (Wormwood) leh tenawma chantîrtute avângin Krista leh a kohhran chu hmuhsitin a awm mêk a. Mi dikte rûmna leh mi pamhamte nuihna hmunah he ram hi chantîrin a awm

mek a ni. Thlarau mite ramah hian eirûknain vûnga chhuah mêk a nih hi.

Sumdâwngte pawh ephah titêa sekel tirittu kan ramah hian eng zât nge awm ang? “Chî a vâng dâwn,” tih vânga a man tito ngâl maitu Kristian kan ni em? Mite mamawh phuhrûktu nih duhna rilru pu pha lo, mahni sahmîm puarna zawng ringawt thîn mi hi Krista zuitu intite zîngah hian eng zât nge awm ang le?

Rinawmna : Bethel chu an thlahtu Jakoba’n Pathian a hmuhna hmun a ni. A u Esauva hlauva a tlânchhiat khân he hmunah hian Pathianin a bia a. Chuvângin, lung a phun a, hriak a leih a, Bethel – “Pathian In” a vuah. Chu hmun Bethel chu Amosa hun thlengin inthawi nân an hmang thîn.

Mahse, an thlahtu Jakobian Pathian chu a hmu a, Pathian hmaa rinawm tûra a intiamna leh Pathian ropuina lam thlîr si lova, Bethel hmuna va kala mahni thiam inchan-tîrna tûra va inthawi (Va in-baptist) chu țha tâwka hriatna an nei lian êm êm mai a.

Mahse, Pathian mit hmuhah Bethel-a an va kal chuan awmzia a nei lo, an tân bawhchhiatna mai a ni. Sual zêp rûk nei chung a Bethel-a kala va inthawi chu Pathian tân tenawm a ni. Pâwn lam lang china fel leh ðha tak anga langa, chhûngril nun erawh chapo leh a rûka sual tih hreh leh si lo nun chu Lalpan a dem a ni. Pathianin a phût zâwk chu rinawmna a ni. Chu chu Pathian duh zâwng a ni a, an nunna tûr a ni. Keini pawhin chu rinawmna chu a ni Lalpa tâwk tûra kan mamawh chu ni.

Hawh u, sual simin Lalpa pan ila, dikna hmachhuanin rinawm takin a rawng i bâwl zâwk ang u. Tichuan, Lalpa lo kal leh hunah lâwm takin amah chu kan tâwk ang.

I dawn ðhîn em zawlnei au aw kha?
 Israel chhûngte zînga sual a hrâng lua e.
 Ephah titea sekel trittu nun chu Lalpan a dem a ni.
 Rethei, pachhia lu chung a vaivut pawh îttu hnêna,
 Zâwlnei vaukhâna aw chu hei hi a ni:

Aw Israel, Bethel-ah lo kal la bawhchhe rawh;
 Gilgal-ah lo kal ula,
 bawhchhiatna tipung rawh u.

Dikna Lalpa chuan simna a ni a phut ni.

Aw Israel, i Pathian tawh turin inpeih rawh.

Buh an zawrh nân thla ral nghâkhlel leh,
 Chhangphut an hralh theih nân Chawlhni ral nghâkhlel,
 ‘Rawn la ulangin, i in ang,’
 titu nun chu Lalpan a dem a ni.

Baptisma inchantîra sim si lo inthawina chu,

Bawhchhiatna tipungtu mai a ni.

I dâwn Chiang em kan ringtu nun hi?

Lalpa mite zîngah sual a hrâng lua e.

Dikna a fam ta, felna tel lo nun chu Lalpan a dem a ni.
 ðhahnemngaihna rêng nei lo dân anga rawngbâwlna hi,

Mahni lu chung a meiling chhek ang a ni.

(Hei ka hla phuah ka rawn chhu tel ta hial a nih hi.)

HRUAITUTE CHANCHIN

Upa K. Lalnuntluanga

Committee Member

Upa K. Lalnuntluanga hi K.L. Darzika (L) leh Sangthuami-te fa pathumna niin December ni 6, 1979 khan Melthumah a lo pianga, an unau hi mipa pali leh hmeichhe pahniin an ni. Tunah hian Melthum Veng, Aizawlah an cheng mek a. Kum 2007 khan R. Lalrinawmi, Kulikawnen Melthum Presbyterian Biak Inah innein, fa pathum – K. Vanlalmalsawmtluanga (Kum 10), K. Vanlalinfela (Kum 8), leh K. Vansangkima (Kum 6) an nei a ni.



RAWNGBAWLNA LAM

Tuna rawngbawlna a chelh mekte chu – Melthum Kohhran Committee Chairman, Melthum Branch KṚP Leader, Hlimen Bial KṚP Asst. Leader te a ni.

Kohhran leh KṚP rawngbawlna lamah hian tleirawl lai atanga inhmang

tanin Branch KṚP Committee-ah kum 1997 khan a lut tan a. Kum 2001-ah KṚP Office Bearer-ah thlan a ni a, Bial KṚP-ah Lungleng te nena bial khat an nih lain Committee member leh Office Bearer a lo ni tawh bawk a. Bial Zaipawlah term eng emaw zat lo awm tawhin, kum 2017-ah KṚP, Aizawl Chhim Presby-

tery Meet Chairman a lo ni tawh bawk.

emaw zat a lo khel ve tawh ṭhin a ni.

Kum 2009 khan Melthum Kohhran Tual Upa atan thlan a ni a. Tual Upa hi term hnih hmang zovin, kum 2015 khan Melthum Kohhran Upa atan thlan a ni a, hemi kum vekhian Aizawl Chhim Presbytery Inkhawmpui, Mission Veng Kohhran Biak Ina neihah Melthum Kohhran Upa atan nemngheh a ni.

Bible chang a duh ber leh innghahna ber chu Thufingte 3:5,6 thu, *“I thinlung zawng zawngin LALPA ring la, Nangma hriatnaah innghat suh; I kawng zawng zawngah amah hre reng la, i kawngte chu a kawhmmuh zel ang che.”* tih hi a ni a. KHB no. 150-na “Khawvel hi bo mah se Isua ka nei” tih leh Conference Hla Bu no. 32-na ‘Ka thupui ber’ tih hla hi a duh hle bawk.

Khawtlang rawngbawlna lamah pawh Branch YMA, YMA Section leh VDP-ahte pawh Committee member a lo ni ve tawh bawk.

Ei leh inah hian sawm a hautak vak lo va, Mizo bai leh chawhmeh tawh phawt chu a ei thei vek bawk.

Infiamna lamah chuan football hi a nuam a tih ber niin, veng aiawh pawhin ṭum eng

KRISTIAN THALAI MAN

Kum 2018 Kristian Ṭhalai lak man la pe lo branch eng emaw zat kan la awm a, chung Branch-te chu thawn an ni tawh lo va, heng Kristian Ṭhalai lak man pek loh tling khawm hi cheng nuai khat chuang zet a ni. Branch pe ṭhate zar zovin kan lo chhian ve ṭhin a ni tih hriain, chanchinbu man pek kawngah ṭan la thar sauh sauh zel turin kan inbeisei thar leh a. Kum hlui man la pe loten pek thuai ni se. Chanchinbu hi a chhuttirna lamah bat a theih ve loh avangin kum thar lak man pawh hi a rang lama pek ṭheuh i tum ang u.



Tu emaw ṭawngkam bungraw lâr tak hawhin, Mizote hi 'intihhmuh ching hnam' kan ni e, te han ti ve ta ngawt ila. Ṭhawkkhat lai khan ui man to, ram dang a/anga chah luh kan intihhmuh viau mai a. Camera man to tak kan intihhmuh leh hle a. Hun a kal leh deuh va, instagram, facebook leh social media dangah te chuan gym-a intisek lai thlalâk a tam leh êm êm a. Kei ka mi mal ngaih ve dân chuan, kan intihhmuh tawh zawng zawngah chuan gym kal intihhmuh hi a fuh ber awm mang e aw, ka ti.

Chutichuan, kei pawh chuan hun rei vak lo a liam chuan gym kal duhna thinlung ka lo nei ve ta! Gym chu ka kal ve ta alawm le. Hâk tur leh bun tur lam ka'n buaipui fe phawt a, gym fee to ṭelh ṭawlh tak ka han pe fel leh a. Kar khat chhung vel kha chu ṭhiante nin khawpin gym kal ṭhatzia ka phulpui hlut a, nun a tihhlimzia ka sawi tui thei khawp mai. Ka han kal ṭan dêk dêk a, ka suangtuahna vak vel chuan kan veng kawng chhovah thaw hluam hluama kal a ngai tawh lo tur te, Myntra-a thawmhnaw chah apiangin "L" ni lovin "XS" ka han chah

tawh tur te ka thlir a, ka lawm êm êm mai a ni.

Ni, gym kal chuan taksa a lo hrisel a, mahni rau rauvah kan hmel a ṭha. Tui kan in tam a. Kan rihna tlahniam zung zung lo mah se, kar hnih khat lekah a taima tan chuan taksa thau chhia inpaihin tihrawl a lo insiam ṭha a. Khawlaia kan han kal vel te hi miin pian nalh chu min ti hauh lo mah se, nuam kan ti ṭan viau a ni. Nunphung pangngaia neiha thlah lova gym kal reng ṭhinte phe chu mi awhawm tak an ni.

Mi thiamten an tia lawm, kum 30 ral kai tawh chinah

chuan taksa a timur (cells) insiam thar zung zung hi a lo muang ãan a. Tleirawl tha zat leh harh vanglai hun kan lo pel a. ðan duan laia chaw ei nghek ðhinten ðan kin hnuah ei leh in titem chuang si lo, thlan tlaa hna thawk hek lo, taksa insawizawina lam ngaihthah zui ta te pheichuan T-Shirt hma puar hak a ngai thuai ðhin. Thau rei lutuk te hi taksa tan a hlauhawm. Natna khirh tak tak - lung ðha lo, BP sang, zun thlum, thin ðha lo te kan lo vei phah ðhin.

Pathian thil rel dân hi a mak khawp a, kan duh loh leh peih loh zâwng tak paltlang hmasa phawt lo hi chuan kan hmabak lawmman hi kan hmu thei lo. Pian nalh leh inthazo nih chu kan duh ðheuh, mahse, thlan sa phulkaia hah taka insawizawia, ei leh ina insum thei mi kan nih a ðul. Pian nalh hi pawisa a lei theih a ni lo. Eng ang pawhin hausa ila, ei tur duh duh zat lei theiin, gym hmanrua duh ang ang lei thei pawh ni ila, kan taimak chuan si loh chuan kan cher chuang hauh lo vang. Thawh rim phawt a ngai a ni.

Ni hnih khat kan han workout ãan a, kan hah êm êm

a. Bai uih uih lo chuan step pawh kan kal hlei thei lo. A thlaa thla, a kuma kum gym-a lo kal tawhte ka'n han awt êm êm khawp a. Ka ngaihtuahnaah chuan "Anni chu an hah tawh awm der si lo va," ka ti; mahse, hah lova gym kalin sawtna a nei lo, an ti leh zel a. Kum tam pawh kal ila, hmasawn zel tur chuan thlan tui far zawih zawiha thawh rim a lo ngai zel tho zuk nia! Mahse, a thawk rim peih apiang an lawm a, an hlim a, an pian pawh a nalh, sek lah an sek narawh e.

Vânram kawng kan zawhnaah leh rawngbawltura chhandam kan nihnaah pawh hian hlawhtlinna hmu turin tei rei peih te, taimak chhuah te, hah te, hrehawm tel te a ngai ve vek tho a ni. "Krista Isuaa Pathian chung lam koh chhan lawmman hmu turin, tiam chin lam chu ka pan ðalh ðalh a ni," (Phil. 3:14) tiin Tirhkoh Paula pawhin a sawi kha. Tiam chin lam pana hahdam tak leh nuamsa taka kal kan tum chuan Pathian min koh chhan lawmman hi kan dawng dawnin a lang lo.

Nuamsa tak leh hahdam taka gym kal tum chuan kar thum a daih kher lo. A tawpa lawmman thlir reng chung a taimak chhuah tlat erawh chuan tuarna phena malsawmna a hmuh tlat avângin a tuar fan fan a, a tuar chhuak nge nge ðhin. Ni tin a kraws pua zui tura min kotu hian, "Kawngka zimah chuan lut rawhnunnaa kalna kawngka chu a zim a, a kawng pawh a chep baw k a, a hmutute pawh tlemte an ni" (Mt. 7:13-14) tiin min hrilh.

Ka ti leh pek ðhin ang, gym kal mawlh mai chu. Thlan dir zawih zawihin, hah namen lovin darkar hnih khat kan han thawk rim a. Kan han zo fel erawh hi chu a nuam êm êm mai a ni. Pathian kan rinna kawngah leh a rawng kan bawlnaah te, kan mawh-phurhna hlen chhuah tur harsa kan tih ve tak kan han tih luih hram te hian, a hun laiin hrehawm ðhin mah se, lawmna namenlo kan nei leh

ðhin. Chuti ni lova, thlahdah taka rawng kan bawla, kan tih tur kan tih peih loh hian rei lo têah a vuak let keimahni vêkin kan tuar a. Hlim viau tura kan inngaih laiin kan ngui leh viau ðhin.

Kristian nun hi gym kal nen a lo inang viau a ni. A taima leh teirei peih an dingchang a. Insawizawi dân tur time table ang thlap thlapa ti ðhinte rihna a tlahniam chak a. Tih tur ti lova 'cheat' ðhinte rihna erawh a tla hnam ve lo. Kan rawngbawlpuite hmuha lan mawi tuma, an hmuh phak lohva 'cheat' ðhinte chuan tute mah kan bum lo, mahni leh mahni kan inbum a ni. Chuvângin, kan hmabaka lawmman hmu turin intihsiakna tha hi bei ðalh ðalh ila, engkimah insumin boruak mai hnek lovin mahni leh mahni inhnek zawk ila, thih thlengin i rinawm ang u. Chuti lo chuan, keimahni ngei pawh hi paihthlâkin kan awm dah ang e.

KTP FLAG ENTIR / HRILHFIAHNA

1. Rawng var hian thianghlimna a entir.
2. Rawng pawl hian Thlarau Thianghlimin min uap reng a ni tih a entir.

NGAIHNAWM NGAIHAWM



9774196355

HNATLANG LEH CHAWNGTLAI BRANCH KTP

Pathian hruainain KTP Chawngtlai Branch chuan kum 60 a lo tling ve ta reng mai. Kum 60 chhunga kan Branch rawngbawlina hrang hrang sawi tur tam tak a awm a. Chung zingah chuan kan Branch-in kan ngaihpawimawh kumkhua hnatlang chanchin hi sawi a nuam thin. Sum lak luhna tha dang kan neih ve vak loh avang hian sum tuak hnatlang hi kan la nasa em em a, kan branch hian thangkhat lian zet chu hnatlangte hming ziak a, hnatlang eiin tur leh hnatlang kaihhnawih thilte buaipui tur Hnatlang Secretary neiin branch-a rawngbawlina pawimawh takah kan ngai.

Kum tin branch hnatlang puia hnatlang kimte hnenah hnatlang kim lawmman kan inpe thin. Dal leh sangha thin hi kan ei tam khawp a, KTP sa min tih sak hial a, dal phei chu a bag kan lei tawp mai a, hnatlang chawhmeh atana dal bag lei a, kawl reng branch dang awm ve tak maw? Kum kalta 2018 khan branch hnatlangpui vawi 20 chuung kovin tha pawh 1020 lai kan seng a ni.

Heng hnatlang zawng zawng hi a nuam vek lo va, a hahthlak vek bawh hek lo. Mi thahnem tak an thawh chang a awm a, hnatlang fahrah

deuh chang a awm bawh. Branch hian bekaung hmun hi a nei fo mai a, an thar tam ngai hlei lo va. 1992 kuma bekaung vuak ni chuan mi pahnih chauh hnatlang mah se, kg 190 lai mai an thar tling.

Kum 2001 khan Branch-in sawhthing hmun kan nei a, a chi thawh khawmin quintal 3 vel lai chu kan ching a. A lin kumah hrallhna a that loh avangin dah kumhlun a ni a. Hralhna a awm ta maw tiha kan han chawh nak chuan a lo riral zo deuh vek mai a, kg 30 chauh mai kan thar a! Uiteme karah kan thawh rim dan te ngaihtuah chuan a

hlawk lo takzet. Ni khat chu thing lain kan hnatlang a, kawngpui bul maiah hian thian dunin thing an zai lauh lauh mai a. A chhak lama thing tuluang chu an rin aia hmain an tan chhum ta si, a tleng thla ta! Thian dun thing tan laite chu an let nghal tawp a. An thutnaah tak mai chuan chu thing tuluang chu a zu insawh chawta. Tlema tlemah na takin an inhliam lo chauh a ni. Tihfuh lo deuh tum kan nei ve nual mai.

Vawi khat chu tui lakna tur thir pipe puin branch hnatlang koh a ni a, a hahthlak dawn avangin chawhmeh atan pawh hnianghnara ei turin arsa an keng a. Mahse mi 11 chauh an thawk ta si, arsa lah an siam tawh bawk si, an hah tlang bawk a, mi sawmpakhatin arsa kg 9 chu an han ei ta a le! Tun thleng hian an puar thu an la sawi thin.

Kan branch hian 2005 atang khan hmun hrang hrangah quarry lian lem lo kan nei ta zel a, KTP quarry atanga lung lak thiam ta pawh an awm ve nual tawh a ni.

Vawi khat chu kan quarry kan lo tlawh khât deuh nge ni, mi thenkhatin lak tumin

bomb an tum a, an lo verh tih kan hria a, kan hal khalh ta a. Kan khawih zui leh mai hman bawk si lo, kan hal thlak sa chu min lo hralsak daih mai a, a thinrimthlak a hril-haithlak hle! Kum 2017-2018-a kan quarry phei chu khaw bul te a ni bawk a, branch hnatlangpui koh ni lovah pawh, chawhnu lamah tal pawh tiin ni tin deuhthaw hian cubic lung lain a hman hman an hnatlang a, a khawharthlak loh hle thin.

Kum 2018 chhung ringawt pawh khan quarry atang hian cheng nuai tel tehmeuh kan thawk chhuak a ni. Heng hnatlangah hian nuam deuha thawh chang te, rim tak leh hrehawm taka thawh chang te, member tam tum leh tlem tum te, hlawk lo taka thawh chang te a tam hle. Sum leh pai hi KTP-te hian kan din chhan ni lo mah se, Pathian rawng kan bawl na atana tangkai leh hlu tak a nih miao avang hian kan neih theihna tur sum tuak hnatlang hi kan bansan thei meuh si lo.

Tuna kan thawh rimna te hi nakinah chuan rawng-bawl na huang chhunga ngaihnaawm ngaihawm a la ni zel dawn a sin.



Vanlalmangaihi Baktawng Venghlun



NI. Vanlalmangaihi hi Pu Lallunghnema leh Pi Lalrampari fate zinga pahnhna niin, kum 1987 March ni 19 khan a lo piang a. A naupan tet aʔanga ʔhenrual kawm thiam, mi hlim thei tak leh fiamthu duh tak mai a ni a. Mi dangte ngainat leh mi pawisawi hlau tak mi a ni. A rawngbawlpuite leh a hnathawhpuite tana ngainatawm tak a ni.

Rawngbawlina lam

NI. Vanlalmangaihi hi kohhran leh KṚP-ah mi ʔangkai tak, ʔhahnemngai taka rawngbawl ʔhin mi a ni a. A chanvo, a kova tlate chu hlen chhuah tum tlat mi, a dam phawt chuan inkhawm, hnatlan leh hla zirte pawh ʔhulh ngai lo mi a ni. Baktawng Venghlun Kohhranah Nilai thupui hawngtu niin, Senior Department-ah te, Sacrament Department leh Department hrang hrangah zirtirtu hna a chelh ʔhin a ni.

Kum 2011 aʔang khan Baktawng Venghlun Branch KṚP Committee member ni ʔanin, kum 2018-ah Finance Secretary a ni a, a thih ni thlengin he chanvo hi rinawm

takin a thawk a ni. Branch KṚP-ah Group hruaituah leh sub-committee hrang hrangah chanvo pawimawh tak tak a chelh ʔhin a. Tin, kum 2011 atanga a boral thlengin Baktawng Bial Zaipawl member thawh hlawk tak leh ʔhahnemngai tak a ni bawk.

A nat dan

A natna a lo lan chhuah ʔan hi kum 2018 November thla vel aʔangin a ni a, a ka chung te na in a insawisel ʔan a. Thingsul Damdawi Inah kalpui niin, a HB hniam nasa leh thisen var tlachham tiin damdawi te an lo chawh a. ʔhat lam a pan theih meuh loh avangin Falkawn Damdawi Inah kalpui a ni a,

test chi hrang hrangte neiin in lamah enkawl zui leh a ni a, November ni 28, 2018 khan Falkawn Damdawi Inah baww kalpui leh niin an lo admit ta a ni. Hetah hian a natna - thisen cancer chu hmuh-chhuah a ni ta a ni. A chauh tial tial avangin ICU-ah dah luh a ni a, thisen cancer bakah pneumonia leh septicemia te hmuh belh a ni a. Doctor-ten theihtawp chhuaha an enkawl laiin December ni 5, 2018 zan dar 11:10-ah a rawng a baww thin Pathian chuan a

hnena awm hlen tawh turin a lo hruai ta a ni.

A tuk December ni 6, 2018-ah vui a ni a. Bial Zaipawlin amah thlahna hla a ruang chungah an sa a, Branch leh Bial KṚP-a a rawngbawlpuite mai bakah Ṛawi Presbytery huam chhunga Branch leh Bial hrang hrang atangin a ruang chungah pangpar dahin mittui nen ui takin kan thlah liam ta a ni.


KṚP EMBLEM

KṚP Emblem hi Kum 1991 General Conference khan Bungkaww Bialin KṚP Emblem siam an rawtna ngaihtuah a ni a, tihtluk a ni ta a. CKṚP Committee-in bawwzuiin, a duh apiang tan design/ziah theih turin kan kohhran chanchinbu hrang hrangah a tichhuak a, thlan fel a nih hnuah a siamtu hnenah lawmman atan ₹1,000/- pek tura tih a ni baww.

Emblem-ah chuan thil pahnih awm ngei ngei tura duh, Committee chuan a nei a, chungte chu:

1. Kristianna tilang thei (Christian symbol).
2. Mizo hnam culture tilang thei (Cultural sign).

Design hrang hrang 142 zet mi 71 hnen atangin theh luh a ni a, chung zing atang chuan mi pakhat design theh luh pahnih te la kawpin siam danglamtir leh a ni a. Committee chuan thlir nawn lehin, a rawng tlem azawng siam thattir leh a nih hnuah KṚP Emblem atan pawm a ni ta a ni (Thurel no. 6 of 7.10.1991). A design-tu hi Tv. Lalawma (*Design a theh luh laia a hming ziah dan*), Jubili Branch a ni. Tunah hian a design-tu Upa Vanlalawma hi Tlangnuam Kohhran Upa niin Synod Press-ah a thaww mek a ni.



KANTU

Kawrthindeng Branch

Kawrthindeng Branch Kristian Thalai Pawl hi Chhingtawp Presbytery huam chhung, Bungtlang South Biala awm a ni a. Kawrthindeng khua hi Bru hnam awm hlangna khua niin kan Synod Mission hmun pawimawh tak a ni bawk. Tunah hian Missionary 11 in an thutchilh mek a, missionary-te hi an ƣangkaipuiin kawng hrang hrangah hma an sawn phah hle a ni.

Kawrthindeng Branch hi January 16, 1988-ah din ni in tunah hian member 74 (Mipa-60 hmeichhia- 14) an awm mek a, Branch Committee 16 an awm mek bawk. Kristian Thalai chanchinbu hi copy 40 an la mek a ni.

Branch Committee hian kum tirah kumtluana rawngbawl dan tur ruahmanna fel tak an nei thin a, hei hian an rawngbawl na leh hmalaknaah hma a sawn tir hle. Branch Committee hi thla tin Zirtawpni zan hmasa berah thut thin a ni. Branch Committee member-ten member in tin tlawh chhuah thin a ni a, hei hian inpawhna tha tak a siam bawk. Tin,

Branch Committee-in member hlate pualin chawnghei bethel te an nei thin a, hlawk an ti hle a ni.

Branch hi Group 2-ah inthenin, Kawrthindeng khuaa missionary lut hmasa, NI. Lairotluangi leh NI. Vanrampari-te hming chawiin inthen a ni a. Group-te hi budget tuk thin an ni a, theihtawp chhuahin sum te tuakin budget tlak theih loh an hlau thin hle. Branch Committee hnuaiyah hian sub-committee hrang hrang din a ni a, chungte chu Evangelism, Reception and Ushering leh Programme sub-committee te a ni a,

Branch tichaktu pawimawh tak an ni.

Thawhtan zan inkhawm hun hman dan tlangpui chu - sermon te, short sermon te, tawngtai rual leh sharing te, thupui zir te leh hla zir te a ni a. Sum tuak dan tlangpui chu - tuahting lak te, Faith Promise te, ar khai te, thingzai put te, thiam thil theh khawm te leh a remchang apianga inhlawh te a ni.

Central leh Bial atanga kan lehkha hmuhte kan ngai pawimawhin an bawhzui tha hle thin. YRC budget te pawh an ngai pawimawh hle thin a, hemi pual hian awareness te pawh an theih ang angin an nei bawk thin.

Tin, group-te hi inchhiarna chi hrang hrang Nilaini zan inkhawm, Inrinni zan inkhawm, Pathianni chawhnu, Thawhtanni zan inkhawm leh kar khat chhunga Bible chhiarah te inchhiar thin a ni.

Branch kum puan thupui atan "Bible chhiar uar kum" puangin kar khat chhunga Bible chhiar tein chhiar thin a ni a, hei hi an hlawkpuuin, Bible chhiar lamah hma sawn phah hlein an inhria a ni.

Kohhran tan theihtawp an chhuah thin a. Biak in thutthleng rawng hnawih te, lectern siam te, kohhran bungbel tihchangtlun te, sound system tihchangtlun te leh a tul dang te kohhran tan an ti thin a. Tin, kumin hian KTP-in chowkidar hna an thawk bawk a ni.

Chhiatni thatni inkaihhruaina chungchangah an member boral an awmin Rs. 500-a ral thin an ni a. Biak in hawnga nupui/pasal nei an awmin zaipawl zai thin a nih bakah lawmpuina thuziak pek thin an ni a; tin, zirna lama hlawhtling an awmin lawmpuina pek thin an ni bawk.

Carol service hi December thlaah neih thin niin, kohhran chhungkuaa mi harsa zual te inah zaiin tanpuina pek thin a ni.

Member-te an inpawh tlang a, hnatlang reng rengah pawh an thawk chhuak tha ve hle thin. Hnam hrang hrang awm khawm ni mah sela an inlungrualin, an rawng-bawlna hrang hrangah pawh hma an sawn phah hle a ni.



HRINGLANG TLÁNG

Lianchhunga te thian!

Chhangte Alabsawmtluanga, Republic Veng

Thang khat lian liam ta khan Mizorama khaw pakhatah hian naupang inkawm ngeih deuh mai Lianchhunga te, John-a te leh Rema te hi an awm a. Lianchhunga leh John-a te chhung hi lo neia eizawng, harsa ve tak an ni a. An kawmchhak tlang, Damdawi In Quarters-ah chuan Rema te chhung an chenga, a pa hi Doctor a ni. Govt. Primary School-ah an kal ho va, Lianchhunga chu pakhatna ni thinin, Rema pawh a thiam pawl a ni a. John-a erawh chu a thiam thei vak lo va; mahse, a inhlang kai ve hram hram zel a ni.

Ni leh thla a ral a, an thianzaho inko thawm pawh hun leh ni tamin a lo chhill ta a, an sulhnu leh an tawlailir chuanna leilung engkim mai pawh a danglam zo ta a. An zinga lehkha thiam thei ber Lianchhunga chu pawl kua zo lovin, sikul a bang a. A hnu lawkah an khaw thenawm nula fel tak mai nupuiaha nei a. Lo te neiin, fu huan leh sawthing hmunte an siam bawka, chhuan chhama awm bik lovin, awngawih ngawih pawh nei bik lovin nun an hman a. An fapa upa ber pawh tlangval ve uaih tawhin, a sikul kal a bang a, chu chu

remchangah la in huan lamah a tha an lo am thung.

John-a erawh a la tlangval a. Lianchhunga te chhung ang maia harsa ve tak thin kha ni mah se, a tum a ruh em a, college te zovin, sawrkarah hna tha tak a hmu tawh a. Tunah tak phei chuan Sawrkar Quarter nuam tak luahin an chhungin an awm ta a. A nuin a ruka min hrilh dan chuan, tunah hian Aizawl pa hausa deuh mai fanu pakhat nen an inkawm uluk riau a ni awm e, kum tawp lam hi chuan Aizawl pa hausa

makpa rangkachak a ni ve thut tawh mai thei a ni.

Doctor fapa Rema pawh kha Engineer zir zovin, nupuih officer bawk a nei a, tunah hian fa pathum an nei tawh a ni. An fa u pahnih te hi India rama zirna intha ber pawlah an dah a, a te ber erawh nausen a la ni. Thlahtute atanga sum leh paia harsatna em em nei lo an ni a, an duh ang nih leh tih chu an tan thil harsa a ni lo.

Rema chu an chhungkaw mi thatna tluanghruoi chuan dinhmun tha chelh theiin a hrut kal ve zel a. John-a pawh a tumruhna daltu harsatna lian lutuk awm lovin, a tum ram a thleng a. Lianchhunga erawh lehkha thiam thei tak ni mah se, an chhungkaw khawsakin a zir ngang lova, a thiante dinhmun chu a pha ve ta lo a ni.

KRISTIAN THALAI CHANCHINBUIN HMA A SAWN ZEL

Kristian Thalai chanchinbu pawn branch tinte tanlakna azarah hma a sawn ve zel a. Kum 2019 chhung hian a la duh in-report tawh atanga thlirin lak zat a pung ngei dawn niin a lang. A lawmawm hle. Kan chanchinbuin hma a sawn zel theih nan than i la thar zel ang u.

Kum 2019-a Kristian Thalai chanchinbu lak dan tur in-report tawh zinga la tam pangate

- | | |
|-----------------------|--------------|
| 1. College Veng | - 801 copies |
| 2. Mission Veng | - 787 copies |
| 3. Mission Vengthlang | - 664 copies |
| 4. Khatla | - 359 copies |
| 5. Venghnuai | - 352 copies |



BAIRABI REL STATION BRANCH DIN HUN

Kristian Ṭhalai Pawl, Bairabi Bial hnen aṭangin Bairabi Rel Station Branch din hun hi May 25, 2013 a ni tih hriattirna kan dawng.

BRANCH DING THAR

1. Tuithiang Vengchhak Branch - Bethlehem Bial chu Nov. 18, 2018 khan din thar a ni a, member 153 an awm.
2. Nov. 19, 2018 khan Kristian Ṭhalai Pawl Pune Branch chu din a ni. member 108 an ni.
3. Dec. 17, 2019 khan Tlangnuam Vengthlang Branch KṬP - Tlangnuam Bial chu din a ni a. Member 162 an awm.
4. Dec. 18, 2018 khan Farkawn Zawra Veng Branch a ding thar a, member 200 an awm.
5. January 7, 2019 khan Galili Branch KṬP din thar a ni a, Kolasib Diakkawn Bial chhung a ni. Member 80 an awm.

CENTRAL JAIL-AH ADVANCE CHRISTMAS

Prisoners' Welfare Committee-in (PWC) CKṬP te Central Jail-a Advance Christmas hmanpui a Gospel Concert nei tura an rawn sawm angin Dec. 16, 2018 (Pathianni) chawhnu khan Central Jail-ah hun an hmang a, KṬP Tanhril Bial hruaituten an ṭawiawm bawk.

HOSPITAL CHARITY FUND PEK A NI

Hospital Charity Fund puala zan khat inkhawm thawhlawm lak khawm chu, a thawh hnihna atan Dec. 17, 2018 (Thawhṭanni) chawhnu khan Synod Hospital-ah Rs. 1,84,489/- pek luh a ni. Sept. 5, 2018 khan a thawh khatna atan Rs. 5,00,000 pek a lo ni tawh bawk.

GRACE HOME COOK HLAWH TUR TUM SEM

Synod Hospital-a HIV/AIDS veite enkawlna, Grace Home-a cook te rawihna atan Dec. 17, 2018 (Thawhṭanni) khan April

2018 - March 2019 chhung atan Rs. 72,000/-chu Synod Hospital Director, Dr. L.H. Thanga Singson hnenah pek a ni.

UPA ATAN THLANG

T.Upa Lalrinmawia Ralte, C/M, CKTP, leh CKTP Fin. Secy., T.Upa Lalmuanawma te chu an lawina Kohhran Khatla South Vengthar leh Kulikawn Vengthlang Kohhran Upa atan an thlang.

SYNOD CHOIR MUSIC VIDEO THAR

Mizoram Synod Choir 2018-2020 tena music video an siam pahnihna 'Pathian hmangaihna' chu January 4, 2019 zan dar 8:45 khan Choir Cabin-ah Upa Rosangliana, CKTP Asst. Leader-in Pathian hnenah a hlan.

C. MALSAWMTLUANGA'N NUPUI A NEI

Jan. 10, 2019 dar 2:00 pm khan C. Malsawmtluanga, C/M, CKTP chuan Republic Veng Kohhran Biak Inah Emily Hmingthansangi, Secretariat Complex chu nupuih a nei.

YRC ATAN SUM PE

Upa Zonunmawia, Mission Veng (CKTP General Secretary kal chhuak) chuan YRC pualin Rs. 30,000/- (singthum) a pe.

HRUAITUTE CHHUAHNA

1. LIKBK Thalai Pawl Inkhawmpui : Dec. 6-9, 2018 chhung khan Lairam Isua Krista Baptist Kohhran Thalai Pawl chuan Sangau khuaah Inkhawmpui wawi 13-na an hmang a, hetah hian T.Upa Lalmuanawma, Fin. Secretary leh Pu K. Lalenzama, Comt. Member-te an kal.

2. Chawngtlai Branch KTP Diamond Jubilee hmanpui : January 10-13, 2019 chhung khan Kristian Thalai Pawl, Chawngtlai Branch chuan an Branch din kum 60-na lawmin hun an hmang a, Pu Lalruatfela leh Pu Malsawmtluanga, Committee Member-te an kal.

3. KTP Khatla Branch Golden Jubilee hmanpui : January 19, 2019 khan Kristian Thalai Pawl, Khatla Branch chuan kum 50 an tlin an lawm a, hetah hian Central KTP min rawn sawm angin Upa Rosangliana, Asst. Leader leh Pu K. Lalenzama, Committee Member-te an kal.



Kantu :Kawrthindeng Branch

CENTRAL K.T.P. HRUAITUTE 2018-2020

Office Bearers


Leader	: Rev. Dr. K. Lallawmzuala	9402551279
Asst. Leader	: Upa Rosangliana	9612166769
Gen. Secretary	: T.Upa Rochungnunga	9862658082
Asst. Secretary	: Upa Ricky Lalrammawia Ralte	9862387308
Treasurer	: Dr. Lalrotluanga	9436153937
Finance Secretary	: T.Upa Lalmuanawma	9436196515

Committee Members

Dr. David C. Vanlalfakawma	9436156561	Tv. Robert Lalduhzuala	9862368012
Pu C. Malsawmtluanga	9862587200	T.Upa Lalsiammawia Pachua	9862742440
Pu K. Lalengzama	7308187298	Upa K. Lalnuntluanga	8974240614
Pu David Lahmachhuana	8415926838	Pu R. Lalbiakmawia	9612762602
Pu Rorelkima	9862266440	Tv. Benjamin Lainunpuia	9862306526
Pu Lalrinchhana Ralte	9774365619	Pu P.C. Lalrinsanga	9436144233
Pu Malsawmtluanga	9612588677	T.Upa Lalrinmawia Ralte	9862359884
Pu Lalruatfela	9436705777	Tv. K. Lalchhanhima	9089933771

Ex-Officio Members

- Rev. R. Lahmingthanga** - *Synod Moderator*
- Rev. R. Vanlalnghaka** - *Synod Secretary (Sr.)*
- Rev. K. Lalrinmawia** - *Executive Secretary i/c KTP*



Postal Regn. no. MZR/81/2018-2020
RNI No. MIZMIZ/2009/29074



Sihfa Pastor Bial KṮConference



Mizoram Synod Choir



Evangelical Church of Maraland KṮkhawmpui

Printed and Published by Rochungnunga, Synod Office, Mission Veng on behalf of Kristian Thalai Fellowship
Edited by Robert Lalduhzuala and printed at Synod Press, Mission Veng, Aizawl, Mizoram. Copies – 40,400

www.mizoramynod.org